

PM melawat LIMA'23 di Pusat Pameran Antarabangsa Mahsuri

SelangorKini.my

24 May 2023

LANGKAWI, 24 MEI: Perdana Menteri Datuk Seri Anwar Ibrahim hari ini mengadakan lawatan ke Pameran Maritim dan Aeroangkasa Antarabangsa Langkawi (LIMA '23) di Pusat Pameran Antarabangsa Mahsuri (MIEC) di sini.

Ketibaan beliau di perkarangan MIEC pada 8.35 pagi ditemani oleh isteri Datuk Seri Dr Wan Azizah Wan Ismail dengan diiringi Menteri Pengangkutan Anthony Loke dan Panglima Tentera Udara Jeneral Tan Sri Mohd Asghar Khan Goriman Khan.

Anwar memulakan sesi lawatannya dengan mengadakan walkabout melihat pameran statik yang mempamerkan beberapa aset pertahanan udara antaranya F/A18D Hornet milik Tentera Udara Diraja Malaysia di landasan terbang atau tarmac berhadapan MIEC.

Perdana Menteri juga sempat meluangkan masa untuk bertemu dengan barisan pasukan udara yang terlibat dalam pertunjukan aerobatik membabitkan lima negara iaitu Indonesia, China, Korea Selatan, Rusia, Emiriah Arab Bersatu.

Kemudian, beliau melawat beberapa reruai di dalam MIEC sebelum dijadualkan menyaksikan majlis menandatangani beberapa Memorandum Persefahaman (MoU) yang turut berlangsung di pusat pameran berkenaan.

LIMA '23 bertemakan "Titik Perhubungan Perdagangan Maritim dan Aeroangkasa Asia" bermula semalam hingga 27 Mei dengan edisi kali ini melibatkan Kementerian Pertahanan dan Kementerian Pengangkutan, masing-masing bagi sektor pertahanan dan komersial.

Kali terakhir acara dwitahunan itu diadakan ialah pada 2019 dan ditangguhkan pada 2021 susulan pandemik Covid-19 yang melanda dunia ketika itu

- BERNAMA

© Copyright 2023 - Developed for the People of Selangor

Source: <https://selangorkini.my/2023/05/pm-melawat-lima23-di-pusat-pameran-antarabangsa-mahsuri/>